

## ԾԱՂԻԿՆԵՐԻ ԵՐԳԸ

(Հատված)

Մեծ գոլն ընկավ, ձրնհալն ընկավ,  
Հողը շընչեց, գեփյուռն եկավ,  
Արևն ելավ վառ ճառագած,  
Հարցմունք արավ հողին հակված.

### Արևը

5 — Սիրուն աղջիկ, ի՞նչ ղըրկեմ քեզ:

### Աղջիկը

— Ես ծաղիկներ կուզեմ պես-պես:

### Արևը

— Ա՛յ աղբյուրներ, ա՛յ գետակներ,  
Սառցի ներքև քընա՞ծ եք դեռ.  
Դո՛ւրս եկեք, դո՛ւրս,

10 Շո՛ւտ, դեպի լուս,

Նոր աշխուժով

Ու նոր ուժով

Կարկաչեցեք

Ու կանչեցեք

15 Հողում քընած սիրուններին՝

Ծաղիկներին ու ծիլերին:

### Ջրերը

— Վո՛ւշ-վո՛ւշ, վո՛ւշ-վո՛ւշ,

էս ի՛նչքան, ուշ...

Աղջի՛, աղջի՛, ծիլ-ծաղիկներ,

20 Քանի՛ քընեք, վե՛ր կացեք, վե՛ր.

- հընկածաղիկ,  
Ծընկածաղիկ,  
Արևքուրիկ,  
Շար-շարուրիկ,  
25 Հասմիկ, հափրուկ,  
Ամանկոտրուկ,  
Հորոտ-մորոտ,  
Աղավնարոտ,  
Կոճղեզ, ճանդուկ  
30 Քուրդ, ճարճատուկ,  
Հարսնածաղիկ,  
Ոսկեծաղիկ,  
Խաշխաշ, ծըծուկ,  
Վարդ, երիցուկ,  
35 Մուշկ-վաղմեռուկ,  
Պուտ, վառվրուկ,  
Շըրվան, մըրվան,  
Շուշան, ռեհան,  
Ապրեմ-շապրեմ,  
40 Բուրեմ-մարեմ...  
Քանի՞ քընեք հողի միջին,  
Եկեք էստեղ, սարի լանջին,  
Առվի ափին, հով ըստվերում,  
Ժայռի տակին, հովիտներում,  
45 Կանաչ խոտով,  
Անուշ հոտով  
Ծիծաղեցեք  
Ու ծաղկեցեք:

### Ծաղիկները

- Բարև, բարև, կարմիր արև,  
50 Ա՛խ, ի՛նչ լավ է դեպի վերև —  
Ազա՛ տ, լո՛ւյս, տա՛ք,  
Կապո՛ւյտ, հըստա՛կ...

### Արևը

- Սիրո՞ւմ եք ինձ...

### Ծաղիկները

- Ա՛խ էնպես եմ սիրում, էնպե՛ս,  
55 էլ առանց քեզ չեմ ապրիլ ես...  
— Ես քեզ հետ եմ ուր որ գընաս...  
— Ես կըտըխրեմ՝ որ հեռանաս...

### Արևը

- Ապա եթե ձեզ համբուրեմ...

### Ծաղիկները

- Ես հաճույքից կըկարմրեմ...  
60 — Ես կըբուրեմ...  
— Ես կըմարեմ...

### Արևը

- Ա՛յ անուշներ,  
Ա՛յ քընքուշներ,  
Ապրեմ-չապրեմ, բուրեմ-մարեմ.  
65 Բաժակներդ բացեք իմ դեմ,  
Հազար գույնի, հազար ձևի,  
Պայծառ, ծավի ու ծարավի,

- Լըցնեմ շողով,  
Գոհար ցողով,  
70 Ջերմ եթերով,  
Նուրբ թըրթիռով,  
Կյանքի հյուսթով,  
Խունկի հոտով,  
Ա՛յ անուշներ,  
75 Ա՛յ քնքուշներ...

### Աղջիկը

- Էս ի՛նչ անթիվ ծաղիկներ կան.  
Ոսկի-դեղին, կարմիր, դեղձան,  
Մոռ, ծիրանի, ճերմակ, պուտ-պուտ,  
Ալ, նարընջի, մավի, կապուտ,  
80 Բացվել, լըցվել, ծաղկել են վառ,  
Ողջ ինձ համա՛ր, ողջ ինձ համա՛ր...